

Шаер иворёс

Москваын кылдйз Михаил Калашниковлы синпелет

19-тй сентябре Москваысь Садовая-Каретная но Долгоруковская сюрес воже интыяськем скверын, Оружейникъёслэн пролказы палангес, Михаил Калашниковлы сйзем памятник усьтйськиз.

Тодмо конструкторлы, Социалистической Ужысь кык полес Геройлы, Россиясь Геройлы синпелет кылдытон бордын тыршиз Россиясь военно-исторической общество, юрттйзы Москваысь город Дума но «Ростех» корпорация. Проектсэ дасяз Россиясь дано суредась Салават Щербаков.

Синпелетэз усьтонэ 200-лэсь трос адями пырыськиз: Россиясь военно-исторической обществоысь, Россиясь Культура министрствоысь, Москвалэн Правительствоысьтыз, Москваын улйсь удмуртъёслэн землячествоысьтызы, Удмуртиысь кивалтйсьёс, М. Калашниковлэн эшъёсыз но чыжы-выжыосыз.

Ужрадын М. Калашниковлэсь зеч сямёссэ тодазы вайызы. Россиясь культура министр, Россиясь военно-исторической огазясъконлэн председател Владимир Мединский пусйиз, тодмо конструктор огшоры сямю гинэ вал кад ке но, котьку землык понна нюръяськиз, калыкез огазеяны быгатылйз. Солэн кылдытэм пычал тйрлыкес Атыкай музеймес утёнын кутйське, автоматэз Кремльысь музейын но Оружейной палатаын возиське, тужгес усто зуч пычал тйрлыкёсын артэ.

М. Калашниковлэн нылыз Елена Калашникова ватсаз, шумпотйсько, пе, синпелетэз усьтызы чапак 19-тй сентябре, Россиян соку пусъё Оружейниклэсь нуналзэ. Удмуртилэн Төроез Александр Бречалов вераз, 2019-тй арын М. Калашниковлэсь 100 ар тырмонзэ пусъёмы. Юбилейлы дасясъкон синпелет усьтон бордысен кутскиз, конструкторез данъяса, Удмуртиын но бадъым ужрадъёс ортчйтэмын луозы.

Удмуртиын гожтозы экономической диктант

12-тй коньывуонэ Россиян ортчоз экономической диктант. Сое Удмуртиын но гожтыны луоз, Ижысь гурт удысья академия радъямъя.



Михаил Калашниковлы Москваын синпелетэз усьтон

Макем зеч тодэ калык экономикаез, та удысэн герзаськем кунлэсь ужзэ? Тодо-а адямиос, кызы уждэ бергатано, кызы уксё поттоно? Диктант та юанъёслы валэктон сётос.

Диктант Россиясь вань улосвыльёсын ортчоз, отчы пырыськыны быгато кунгож съёрын улйсьёс но, соос зуч кылз тодо ке. Вераны кулэ, диктант 3 пöртэм луоз. Соос лэсьтэмын, калыклэсь арлыдзэ чакласа, озы ик лэсьтыны кулэ луоз пöртэм пумо йыртйяньёсты, юанъёслы валэктон сётъяны. Кин диктантэз парта съёры пуксьыса гожтыны уз быгаты, соос понна вотэсбам ужалоз.

Диктантэз радъя «Россиясь эрико экономической огазясъкон» Правительство бордысь финансовый университетлэн юрттэмезъя.

Сергей Захаров

Олег Поскрёбышевен люкам книгаос вуизы Йёскалык библиотекае

Удмуртиысь калык кылбурчилэн Олег Поскрёбышевлэн чыжы-выжыосыз солэсь люкам книгаоссэ Национальной библиотекалы кузьмазы.

Удмуртиысь зуч кылбурчи но публицист Олег Поскрёбышев вордйськемын 1930-тй арын 10-тй июле Кез ёросысь Бани гуртын. Кылбуръёсаз со данъя Удмурт шаерысь чебер инкуазез, калыкез. Тросэз ужъёсыз удмурт, украин, коми, немец но мукет кыльёсы берыктылэ-


мын. Огъя 27 книгаез печатламын.

Олег Поскрёбышев дораз бадъым библиотека люкам. Сое тус-тас каронлэсь утён понна но лыдзись доры вуттон вылысь, О. Поскрёбышевлэн кузпалы Зоя Ивановна но 2 нылъёсыз книгаоссэ Национальной библиотекалы кузьмазы.

Библиотеканын ужась Надежда Прошина верамъя, кылбурчи 50 арлэсь кемагес люкам та книгаоссэ. Соос пöлын трос Удмурт шаерысь чеберлыко литература, озы ик Россиясь калыкёслэн поэзизы но прозазы, кунгож съёрысь авторъёслэн ужъёссы, литературоведческой книгаос но мукет. Уката но трос кылбур бичетъёс, кылсарысь, А. Пушкинлэн, Ю. Лермонтовлэн.

Оглом 1000-лэсь ятыр книгаос вуизы фондазы. Соос пöлысь 200-лэсь тросаз книгаосын вань авторъёслэн кинюртэмзы но Олег Поскрёбышевлы зеч кылъёссы, кылсарысь, Сергей Викулов, Лев Ошанин, Флор Васильев кылбурчиослэн. О. Поскрёбышевлэн библиотекаез Национальной библиотекалэн фондаз нимаз коллекция сямён интыямын луоз.

*Наталья Самсонова,
«Удмурт дунне» газет*



Олег Поскрёбышев дораз бадъым библиотека люкам